

Segunda carta del apóstol San Pablo a los Tesalonicenses

Pablo y sus compañeros escriben a la iglesia de Tesalónica

1 ¹As Pábloat carit uch ba acu ayin Silvanos owár Timoteo owár cuihsuro. Ba Tesalónica pueblo itquin acu cuihsuro. Baan Jesucristo cutar is acu rábinro. Baan Sir acu Tet acu chíwaro. Cara Jesucristo acu chíwaro. Ba bahnaquin acu carit uch ayin cuihsuro. ²Sirat Tetát cat Cara Jesucrístoat cat ba sehnác etar aját ba cuitar conro. Ba obir yajcayta acu ba ohbac ítayta acu conro.

Dios juzgará a los pecadores cuando Cristo venga

³Rábinu, isat ba ítitan, baat Sir chihtawan acsar, acsar cuít síhw̃aro. Sir chihtá cuitar ba rahran rahran acsar sehnacan cuít rehcaro. Eyta bira isat ítitan, ba Sir chihtá cuitar ay itic síhw̃aro. Eyta síhw̃ar isat Sir quin wacaro: “Bahat eyin obir yajcaro. Oquéy bah ur ayro,” wacaro. Isat Sir quin eyta wacata bin etar wacaro. ⁴Baan eyta etar isat Jesucristo uw quin wacaro: “Tesalónica úwatan Sir chihtá ay cájacro,” wacaro, ba ojcor. “Wácati cácaro,” wacaro. “Tesalónica uwat Sir chihtá cajac ques cahujinat ruh̃w̃ úc cuar, Sir chihtá wácatiro,” wacaro. “Bitara útara ruh̃w̃ úc cuar, wácatiro,” wacaro, ba ojcor.

⁵Uwat ba ruh̃w̃ úc cuar baat Sir chihtá wácati etar Sirat ba síwayqueyra. Ba eyta síwata bin etar baan eyta síwayqueyra. Siwir ba quin wacáyqueyra: “Baan as cara rehquey cutar ita racar rehcatat uwat ba ruh̃w̃ujacro. Eyta bira baan as cara rahquey cutar as jor ítuwi,” wacáyqueyra, Sirat ba quin. ⁶Sirat uw acu yajcata bin yajcáyqueyra. Bfíyinatán ba ruh̃w̃uyat, Sirat eyin bar cuécwayqueyra. ⁷Cuat ba biyín ruh̃w̃uyat, Sirat ba bar síwayqueyra. Is cat síwayqueyra. Cara Jesusan cuacúr bin wicayat, síwayqueyra. Jesús cacmín chihjirán cuít bin owár wicáyqueyra. Eyan wan beo beo tan cut ocan cuboran wan wicáyqueyra. ⁸Eyta wiquír, Sir chihtá cati bin cuécwayqueyra. Is Cara Jesucristo ojcor ehcujaquey chihtá cati bin cuécwayqueyra. Cuatán bara síwayqueyra. ⁹Jesusat eyin Sir

tayar yajác ques icar etiti cuéwayqueyra. Cab oc icar uwan cuánaan acu cuéwayqueyra. Jesucristo ima jor it aya báreyra. Jesucristo caran cuít etar, ayan cuít etar, ey jor it aya báreyra. ¹⁰Jesús wicayat, ima chiwat ey ojcor ay wacátaro. Ima chihotá cájaqueyinat eyan cara cuít yehnjác wacátaro. Baat cat eyin owár secuar eyta wacátaro. Isat ba quin ehcujaquey cajac etar eyta secuar wacátaro.

¹¹Eyta wacata sihwā rabar, ísatan ba cuitar Sir ojcor conro. Búcoyan búcoyan ba cuitar etiti conro. Sir imát baan ima chiwa cajac etar baat caba cajac síhwāyta acu Sir ojcor conro. Sirat ba quin urá wícyta acu conro. Baat icuran biyan yajquín síhwāquey ay yajcayta acu conro. Baat Sir chihotá cajac rehquít baat icúr yajca rácartar eyta yajcayta acu Sir quin conro. ¹²Baat ay yajcayat, uwat istáyqueyra. Istír Cara Jesucristo ojcor ay wacáyqueyra. Jesucrístoaat cat Sirat cat ba sehnác etar ba tamo cat ay síhwāyqueyra.

El hombre de pecado

2 ¹Rábinu, ahra aját Jesús wicata chihotá ojcor waquinro. Isan Jesusat beyar ima owar sécuata chihotá ojcor waquinro. Aját ba cahujinat tan chiwīti acu waquinro. ²Baat Jesús sicor wicata ojcor sínjaquey tehmoti acu aját ba quin waquinro. Uwat imár urá cutar wacata óraro: “Jesús sicor wiquíc cab cuanjacro,” wacata óraro. Cahujinat “Sir Ajcan Camur Ey chihotá cuitar ehcuro,” waca rabar ehcwata óraro. Cahujinat cat “eyta tewīc rahjacro” waca rabar ba quin im eyta ehcwata óraro. Cahujinat cat “Pábloa carit cut eyta cuihsúr áyjacro,” waca rabar eyta ehcwata óraro. Eyta ehcwayat chihotá cati jawī. Eyta waquíc tamo sihwā sácatai jawī. ³Rahcti jawī. ¿Ba cayar yájcajaqui? Jesús wiquín cahmoran uw to binat Sir quehswáy yináyqueyra. Ur ay bár bin cara yehnáyqueyra. Eyta yehnata eyan Sirat cab oc icar ten acu binro. ⁴Cara yehnata eyat ajc bahnác sirin quehswáyqueyra. Biyin ójcoran uwat “sira” wacáyatan, biyin quínoan uwat “siru” wacáyatan, eyat eyin quehswáyqueyra. Etar ima Sir usar Sir banco cutar chihráyqueyra. Chihritrun “Asan Sitro,” wacáyqueyra. “As tamo síhwāwi. As ojcor conwi” wacáyqueyra. Sir banco cuitar chihrir eyta wacáyqueyra. Ey anto yehnti cuácayat Jesús wica báreyra.

⁵Asan récaram ba owár cuácayatran aját ey ojcor ba quin ehcujaacro. Behmáratan eyta itro. ⁶Caran eyta yehnata eyan anto yéhtiro. Biyat ey yehn ayti síwictara baatán itro. Eyta yehnata cab cuti etar yehn áytiro. ⁷Cuatán ahra Cristo quehsuquib cara yehnín acu bitara útura yajcáy yinjacro. Uwat istiti yajcáy yinjacro. Eyta cuar yehn ayti síuqueya anto uc áytiro. Anto yehn ayti síuquey uc oco tas Cristo quehsuquib yéhnajatro. ⁸Cuatán yehn ayti síuquey úcayatran Cristo quehsuquib cara yehnár uw ubot bar wáyqueyra. Eyta yehnár uw ubot waacayat, ey yahncút Cara Jesucristo sicor bar wicáyqueyra. Jesucristo sicor wiquír catrum, cara eyra bar yawwáyqueyra. Ima camur cuso cuhr cutar eyan yawwáyqueyra. Ima wan beo beo ayan cuít bi cutar sutáyqueyra. ⁹Jesucrístoaat ey anto sutiti cuat ur ay bár eyat Sisráam Satanás chihotá yajcáyqueyra. Sisráam

urá cut icúr bár sicar bitara útara yajcáyqueyra. Sistrám urá cut bahnác yajcata chih́ta uwat síhŵayta acu yajcáyqueyra. Uwan eta jaw̄ cayar yajcáyqueyra. Uwat anto istiti bin yajcáyqueyra. ¹⁰Ur ay bár bitar utar yajquír cutar uw ur ay bár bin cayar yajcáyqueyra. Sir imát cuécwata bin cayar yajcáyqueyra. Eynat Sir chih́ta ca cun bár rehjecro. Sir quin imár siu ay cun bár rehjecro. Etar ques icar Sirat cuécwayqueyra. ¹¹Eynat Sir chih́ta cac cun bár etar Sirat eyin bow̄ ca téjecro. Súcuarinat eyin cayar yajcayta acu bow̄ cas téjecro. ¹²Eyta bira Sir chih́ta cac cun bár eyin Sirat cuecun acu chájacro. Sir ima chih́ta rahcti cuat ur ay bár yajca racar rehjecro. Eyta etar cuecun acu chájacro.

Escogidos para ser salvados

¹³Rábinu, Jesusat ba sehnác reht, Sirat ba imáy cájacro. Anto cabar cuanti cuat echí ba imát siwin acu cájacro. Eyta cajac etar ima Ajcan Cámuran Eyat ba Siray ajquír chácaro. Baat ey chih́ta rahcyat eyta chácaro. Eyta chajac etar isan Sir quin “oquéy” wacaro. “Baat is uw obir yajcaro,” wacaro. ¹⁴Isat Sir chih́ta ay bi ehcwayat baat cajac etar Sirat ba cájacro. Jesucristo cara rehquír eyta is cat ey jor cuacúr carin rehcayta acu is cájacro. ¹⁵Eyta bira, rábinu, isat ba quin chih́ta síw̄ jaquey wácati jaw̄ í. Ey chih́ta ay caw̄ í. Behmár quin tew̄ jaquey cat, carit cutar ba quin siw̄ jaquey cat ay caw̄ í.

¹⁶Cara Jesucrísticoatan isan sehnacro. Sirat cat isan sehnacro. Is sehnác rehtan is bur cut suw cut tan wan ítayta acu urá wícaro. Ima wiquíc acor seoti ítayta acu urá wícaro. ¹⁷Siran is Tetatán, is Cara Jesucrísticoatan ba tan wan ítayta acu conro. Ima chih́ta wácati acu ba quin urá wícayta acu conro. Baat ay yajquín acu, ay tew̄ ín acu ba quin urá wícayta acu conro.

Oren por nosotros

3 ¹Ahra, rábinu, ubar ojcor aját uch wacaro: Is cuitar Sir ojcor conwi. Cara Jesucristo chih́ta acsar acsar ehcwayta acu conwi. Uwan to binat Jesucristo chih́ta ajcá ji beyayta acu conwi. Ba owár binat Jesucristo chih́ta acsar acsar rahcuír ajcá ji beyar eyta cahujinat cat eyta rahcuayta acu conwi. ²Ur ay bár binat is ruhŵuti acu conwi. Uw cahujínatra Sir tamora séhŵatiro. Eynatra is ruhŵata yajcaro. Eyta bira is cuitar conwi. ³Sir imat ba acu bi yajquín wajactar im eyta yajcáyqueyra. Ba quin urá wícayta queyra. Sistrám cahmar ba obir yajcáyqueyra. ⁴Isat ítitan, Sirat ba urá wícaro. Eyta etar ba quin chih́ta ehcujác ey baat yajcáy yinjacro. Acsar cat baat wácati yajcata síhŵaro. ⁵Baat Sirat ba sehnác chih́ta istayta acu isat ba cuitar conro. Jesucristo tan uquir eyta baat cat eyta tan úcayta acu ba cuitar conro.

El deber de trabajar

⁶Rábinu, isat Cara Jesucristo ajc cut ba quin uchta yajc ayro. Rabin cahujinat canar yajti ohca sinro. Eynat isat Sir chih́ta síw̄ jaquey cat cati ruhŵuro. Eyta bira eyin íw̄oti jaw̄ í. ⁷Baan bitara ítatatara baatán ay itro. Isan récajian

ba owár bitar íthactar ba cat eyta ítataro. Isan ohca sinti ítchacro. Canarán ohca sinti yajacro. ⁸Isat cahujín ira túntira yátiro. Cuatán cab istiy cut ricar cat, cheycar cat canarán to yajacro. Isat ba quin bucoy bucoy ira buw̄ sicayat ba seowata etar ijmarat yayín acu canar cat yajacro. ⁹Isat ba quin Sir chihtá ehcuác rehquít, isat ba quin ira ohbac buw̄ata bin cuar, ísatra éytara buw̄ sítiro. Cuatán isat ray cuitar ira wahn acu canar yajacro. Isat yajquír eyta baat cat eyta yajcayta acu canár yajacro. ¹⁰Ba owár ita rabar uchta wac bahjacro. Bíyatan canar yajti ohca sínyatan, éyatan ba owár ira yáyajatro. ¹¹Cuatán isat cucáj cuitar rahcuít, ba cahujín canár yajti itic wacaro. Uw éyinat istiy quin, istiy quin rio rabar téw̄ajar bin tew̄ ic wacaro. ¹²Eyta cuácayatra isat canár yajti itquin quin uchta wac ayro. Cara Jesucristo ajc cut uchta yajc ayro. Bara cuáyitra tew̄ti jaw̄ i. Canari yajti ítiti jaw̄ i. Behmár yayín ac canar yajw̄ i.

¹³Rábinu, baat ay yajcata bin yajca rabar yajquíc séoti jaw̄ i. ¹⁴Biyat carit uch cut chihtá cuihsujaquey cati ruh̄w̄ úctara eyra íw̄oti jaw̄ i. Eyra íw̄oti chácayat, imát ay bár yajác síhw̄ata óraro. ¹⁵Baat quehsí bin tecuar eyta eyra eyta técuati jaw̄ i. Tew̄ata eyan ajc uní cuitar waw̄ i. Rabin etar eyta waw̄ i. Aját ba quin eyta yajc ayro.

Bendición final

¹⁶Cara Jesusat ba ohbac ítayta acu conro. Cara Jesusan uw ohbac it áyqueyro. Baan cuanmí cut, cuanmí cut etiti ohbac chácayta acu conro. Ba acam bitara rehquíctara ohbac chácayta acu conro. Siran ba owár rehcayta acu conro.

¹⁷As Pábloat ba tamo seh̄w̄ac chihtá ehcún acu ajmarát cuihsuro. Carit istiy cut, istiy cut ajmár at cut ubar ojcor ey eyta cuihsuro, baatán aját cuihsujác istayta acu. ¹⁸Cara Jesucristoat ba obir yajcayta acu conro. Amén.